


TEZĂUR LITURGIC

3 MAI

ACATISTUL SF. MUCENIȚE XENIA DE LA KALAMATA



MOSCOVA, 2000



Акафист

великомученице

КСЕНИИ ПЕЛОПОННЕССКОЙ

Кондак 1

Избранная угоднице Божия, светом Христовым одетая и огнем Божественным осиянная, святая великомученице Ксение, восхваляем ангелоподобное житие и честная страдания твоя; ты же, яко имущая от Господа силу свободдати верных от тьмы духовныя, даруй исцеление и заступление с любовью тебе зовущим: Радуйся, Ксение, мученице многострадальная.

Икос 1

Ангельскою чистотою ко Господу приблизившаяся и с мученическим ликом ныне веселящаяся, Ксение преславная, токи помощи всем изливаеши и покровительство свое даруеши вопиющим ти:

Радуйся, чистоты зеркало.

Радуйся, идолов плачевное поражение.

Радуйся, сомневающихся ободрение.

Радуйся, смиренных радование.

Радуйся, девственников похвало и украшение.

Радуйся, благодатным светом осиянная.

Радуйся, Ксение, мученице многострадальная.

Кондак 2

Видящи непостоянство мира сего многосуетнаго, житие земное к горним направила еси, Ксение преблаженная, хитрости злолукаваго врага постом и молитвою побеждая и непрестанно Богу поя: Аллилуиа.

Икос 2

Разумом Божественным просвещенная, ум и сердце к Небесному отечеству вперила еси, великомученице, и, во благочестии преуспевая, сокровищем нетленным обогатилася еси. Темже ныне Церковь Святую украшаеши и граду Каламону покровительствуеши, верным же болезни телесныя исцеляеши и смрад греха от них проганяеши, восхваляющих тя сице:

Радуйся, храме благодатный.

Радуйся, голубице, сияющая чистотою.

Радуйся, смирно, целомудрием благоухающая.

Радуйся, недужныя врачующая.

Радуйся, к Небеси нас направляющая.

Радуйся, восхваляти Господа нас научающая.

Радуйся, Ксение, мученице многострадальная.

Кондак 3

Силою Всевышняго, Ксение богомудрая, демонския нападения попираеши, искушения врага рода человеческого отгоняеши и крепкия узы его разрушаеши, похоть плоти и очес усмиряеши, Богу же пети всех научаеши: Аллилуиа.

Икос 3

Имея тщание со Христом выну пребывати, мучений лютых не убоялася еси. и на столбе висящи, плоти своея строгание и прижигание мужественно претерпела еси; последи же от Ангела утешение и исцеление улучила еси. Мы же, дивящися таковому терпению твоему, во умилении сердец зовем ти:

Радуйся, маслино многоплодная.

Радуйся, светом Божественным одеянная.

Радуйся, света Небеснаго сияние.

Радуйся, винограде вертограда Христова.

Радуйся, Христа достойно воспевающая.

Радуйся, велиара страданиями своими попирающая.

Радуйся, Ксение, мученице многострадальная.

Кондак 4

Буря мучений от нечестиваго игемона, юже воздвиже на тя, агнице святая, во еже поколебати веру твою во Христа, ничимже возможе смутити тя, Ксение: ты бо, нерадивши о муках и мужеством вооружившись, радостно вопияла еси Господеви: Аллилуиа.

Икос 4

Слышав от тебе злочестивый правитель Дометриан словеса о вере Христовой, распаляшеся на тя злобою и, по жестокосердию своему, на многообразныя муки предаде тя, обаче ничтоже успе о укрепляющем тя Христе Иисусе. Темже, поминающе честная страдания твоя, со умилением зовем ти:

Радуйся, добродетельми сияющая.

Радуйся, в вере утверждающая.

Радуйся, кротости научающая.

Радуйся, радости духовныя исполняющая.

Радуйся, мучеников Христовых сопричастнице.

Радуйся, всем приходящим к тебе пристанище.

Радуйся, Ксение, мученице многострадальная.

Кондак 5

Боготечней звезде подобна была еси, Ксение, егда в темнице посети тя Христос и, исцелив раны твоя, возгласи тебе: «Не убойся, Ксение, мучений: вскоре бо избавишия от всех искушений и будеши пребывати со Мною во веки!», Егоже, ликующи, славословила еси, поя: Аллилуиа.

Икос 5

Видя мучитель тя, святая Ксение, изведенну из темницы, здраву телом и ликом светлу, паки повелеваше ти пожерти идолом, рече бо, яко тии чудесне тя исцелиша. Ты же, яко богомудрая дева, рекла еси ему, яко исцели тя Господь Иисус, а не ложныя боги, и во уверение сего, пришедши во храм идольский, помолилася еси Единому Истинному Богу, от Егоже святаго

имене вся идолы падоша и разсыпашася. Мы же, прославляя велию веру твою, вопием ти:

Радуйся, благочестием одеянная.

Радуйся, терпением облеченная.

Радуйся, от искушений свободящая.

Радуйся, бури страстей утишающая.

Радуйся, иночествующим пособствующая.

Радуйся, благочестивых веселием исполняющая.

Радуйся, Ксение, мученице многострадальная.

Кондак 6

Проповедницею чудес и славы Божия явилася еси, Ксение добропобедная: егда бо жестоковыйный епарх повеле привязати тя к коню и по камени влачити, милосердный Господь сотвори коню не двигатися, да не сотворит тебе зла. Людие же, видевше чудо сие и восклицающе: «Велик Бог христианский!» - увероваша во Христа, вопия Ему: Аллилуиа.

Икос 6

Возсия в темнице свет Божественный, доблестная великомученице, егда посреде нощи паки явися Господь Иисус Христос и рече ти о

приятти тобою венца победнаго, иже украшает
девственников во Царствии Небеснем. Мы же,
прославляя Бога, дивнаго во святых Своих, во
умилении сердец поем ти:

Радуйся, сладострастия обличение.

Радуйся, чистоты образе.

Радуйся, страданьми достигшая Небесе.

Радуйся, славою в лице страстотерпцев
блистающая.

Радуйся, мятущихся успокоение.

Радуйся, недужных исцеление.

Радуйся, Ксение, мученице многострадальная.

Кондак 7

Хотя безумный игемон желание свое улучшить,
паки покусися ласкательными словесы к
почитанию ложных богов и супружеству тебе,
святая великомученице, приклонити, не
вразумившися бывшими на тебе чудесы
Божиими. Ты же, лукавство его отвергши,
вопяла еси Христу: Аллилуиа.

Икос 7

Новую показа безчеловечия ярость
зверообразный мучитель, егда повеле чрез
мечное усечение умертвити тя,
многострадальная Ксение, тело же твое честное
огню предати. Темже, мученическую кончину
твою благоговейне воспоминающе, похвалами
блажим тя сими:

Радуйся, исповеднице Христова.

Радуйся, мученице препрославленная.

Радуйся, страданьми своими Бога
прославляющая.

Радуйся, молитвами твоими милосердие Его на
нас изливающая.

Радуйся, града Каламона украшение.

Радуйся, всех христиан защищение.

Радуйся, Ксение, мученице многострадальная.

Кондак 8

Странна и страшна бысть мученическая
кончина твоя за Христа людем неведущим Бога,
присноблаженная Ксение: ты бо, на место казни
приведенная, усердную молитву вознесла еси ко

Господу и, с радостью приявши за Него мучения, воспела еси: Аллилуиа.

Икос 8

Весь Сладчайший Иисус сладость тебе бысть, мученице Ксение, за Негоже горькия муки и истязания претерпела еси; темже душа твоя радостию велиею вострепета, егда во время молитвы твоя Божественный глас благовествоваше ти о исполнении прошения твоего. От нас же приими похвальная сия:

Радуйся, Ангелов удивление.

Радуйся, земнородных украшение.

Радуйся, нечестия прогонительнице.

Радуйся, верных наставнице.

Радуйся, о всех нас молитвеннице изрядная.

Радуйся, недугов душевных и телесных целительнице скорая.

Радуйся, Ксение, мученице многострадальная.

Кондак 9

Вся Силы Небесныя и святых лица радостно тя сретоша, страстотерпице славная, егда во врата Царствия Небеснаго возшла еси, во еже от руки

Вседержителя венец нетленный прияти и в радости святых воспевати: Аллилуиа.

Икос 9

Витийство человеческое не довлеет достойно восхвалити страдальческия подвиги твоя, мученице святая, ты бо под меч острый, аки под венец красный, радостно потекла еси, и во главу усекновенна бывши, душою твоею возлетела еси в чертог Жениха твоего, Христа Бога. Мы же вся сия поминающе, со умилением приносим ти песнь сицевую:

Радуйся, образе целомудрия.

Радуйся, правило милосердия.

Радуйся, бесов прогонительнице.

Радуйся, вражиих козней разрушительнице.

Радуйся, проповеднице чудес Божиих.

Радуйся, наставнице добрых дел.

Радуйся, Ксение, мученице многострадальная.

Кондак 10

Спасительнаго твоего подвига течение зряще, восхваляем страдания твоя, мученице преславная, и молим тя: омраченныя страстьми

сердца наша просвети и оставление грехов нам у Щедродавца Бога испроси, да вопием Ему с тобою: Аллилуиа.

Икос 10

Стеною молитв твоих от бед и зол сохраняй вся православныя христианы, и путем правым в Царствие Небесное нас руководи, да твое предстательство пред Господем поминающе, со умилением зовем ти:

Радуйся, страданьми твоими Церковь Христову украсившая.

Радуйся, демоны ногами твоима поправшая.

Радуйся, молитвами твоими избавляющая от скорбей.

Радуйся, ходатайством твоим свободяющая от искушений.

Радуйся, сокровищнице исцелений неоскудная.

Радуйся, чаше даров Божиих преизобильная.

Радуйся, Ксение, мученице многострадальная.

Кондак 11

Пение хвалебное приносим ти, святая великомученице Ксение, и смиренно молим тя:

умоли Господа о нас, грешных, да низпослет и нам благодатную помощь Свою, поющим Ему: Аллилуиа.

Икос 11

Светоподательная свеча была еси во страдании твоём, святая мученице, озаряя светом православныя веры всех взыскующих Бога истиннаго. Сего ради с любовью вопием ти:

Радуйся, веру Христову возлюбившая.

Радуйся, чистоту девства твоего соблюдшая.

Радуйся, претерпевшая тесноту Царствия ради Небеснаго.

Радуйся, скорбьми твоими к Богу приблизившаяся.

Радуйся, девственных ликостояний неотступная хранительнице.

Радуйся, иночествующих Небесная наставнице.

Радуйся, Ксение, мученице многострадальная.

Кондак 12

Благодать дана ти от Бога хранить и соблюдать от различных болезней, бед и скорбей всякаго человека, верую и любовь честная страдания

твоя почитающаго. Темже молим тя, страсотерпице Христова: молитвеннаго твоего предстательства не лиши и нас, грешных, да и мы в нынешней и будущей жизни поем о тебе Богу: Аллилуиа.

Икос 12

Поем твоя подвиги, почитаем страдания, хвалим долготерпение и непобедимое мужество, ублажаем святую твою кончину и молим тя: простри с Небесе помощь твою на нас, вопиющих ти сие:

Радуйся, серафимския любви подражательнице.

Радуйся, диавольских сетей разрушительнице.

Радуйся, чудесы твоими нас утешающая.

Радуйся, враги невидимыя от нас отражающая.

Радуйся, дары целебныя земнородным подающая.

Радуйся, к бедствующим на помощь ускоряющая.

Радуйся, Ксение, мученице многострадальная.

Кондак 13

О святая великомученице Ксение, приими сие малое моление от сердец, любящих тя, и молися за ны ко Господу, да простит нам вся прегрешения наша и сподобит нас Царствия Небеснаго, идеже вкупе с тобою и со всеми святыми воспоем Ему: Аллилуиа.

(Этот кондак читается трижды, затем икос 1 и кондак 1)

Молитва

О прехвальная мученице Христова Ксение, благонадежная наша пред Господем предстательнице! К тебе усердно прибегаем и во умилении сердец наших просим: умоли Господа и Владыку нашего да пробавит милость Свою к нам, недостойным рабом Его, да подаст грехов наших прощение, мирное и благочестивое житие да дарует нам, кончины же живота непостыдныя и мирныя и блаженства вечнаго в будущем веце нас да сподобит, да выну возсылаем славу и благодарение Отцу и Сыну и Святому Духу во веки веков. Аминь.